

# 1 TIMOSI

## Timosike Namolo Takoa Wia Wetekane Pipia

**1** <sup>1</sup>Polo nopa Keraisu Yesuno Aposelo ago i mekene uku. Eya agotame toto toa motoko ago Akolali ni Yesu Keraisu one noatekoya tokolo totome nepia meko agotame no moa kakakoiya tokolo ni uku-ye.

<sup>2</sup> Timosi neke i pipia wiane wini wetekakilepa nepa anu manago tetepo taneya mea nopala odene wene piitikoa Keraisunole takama yawa toko ago tokolo tuku. Toneketai Akolali tone Ali Muno Yesu Keraisuta kitame einago nepa pewe wia ela moa tepe kolotini kilikoa pikoa toe wane neke kowitikakene uku-ye.

### Pamo Olaukane Ali-kitike Pubu Akenemo

<sup>3</sup>Masedonia take poadene pekene tamene wane okouna wa lokoane uku. Epesase take pa wida mea kamene. Wini take padeka-kitame Akolaline agale pilia wakete kini wene kibututukoa okoimo pamo olaukakete tikino, nitamoati wa mane oa moamene. <sup>4</sup>Wini yenamepa la agale Akolaline agale tetepo takoa oa ni kini kaua-mikitane ibini i i wa ete oto wa mate agale oa tokala tiki. Enile toa wipitiketepa pa agale-kala oa takoa pili pili toa kawei. Ali atoame Akolaline wene toopianele toadete oneke wene tuga memotoa olaukatikiyake nile-kala toa kaki. <sup>5</sup>I totono neeke wini wiane wetekakilepa ali atoa kini kini wene mekanali yoma pamene wa neme olaukamotoane tuku. Edikama yawadetepa poane wene takoa koikatapeneya mea ni tepeme ta wa oa epetekakale-kama toa ni Akolalinele odene wene piitikoa takoa tamene wa olaukamotoane uku-ye. <sup>6</sup>Pade-kitame i totono litia toake wawa pata paka pekete pa agale ete oto wa topo takoa ekete tiki. <sup>7</sup>Nipa Akolaline totono olaukou wa wene pia tikilepa eni totono pine piko toa wene toameketekete tiki. Nitoa i i wa olaukakimoka kini wene toamenemo olaukakete tiki.

<sup>8</sup>Totome eya wa wene toko. Akolaline totono ali atoame litia toatiki toa litia tikilipa epetikilepa toko. <sup>9</sup>Akolaliyo one totono yametekilepa wene epetaneya

meki yene takoa pubu oa tokoya mena. Eya tiki yene takoa pubu oko. Kini totono tetekoa ni kini tobou ali-kitane agale tagoa toamoa ni Akolali mukiti yamea wawa ni ele kule poanele toa ni Akolalinele takamoa kinikile itonole-kama toa ni etene nine wia tukoa ni ete-kitika wia tukoa tiki yene takoa pubu oko.<sup>10</sup> Ni mone koua piamatiki atoa-pala koua pia ni alime ali yagono kini natono latikoa koua pia ni kini pupu-kama takamotoa ali kode moa egetoa ni kapene yokoa ni nimini agale uku wa eketekete oa yotoko tiki-kiti takoa pubu oko. Nipa mea epetekakete toatikile olaukanemo yakamekete ele kule poanele tiki-kiti takoa pubu oko.<sup>11</sup> Wedianeya-kama meko Akolali one pa tootapeneyea mea epetekakome tokomopa e yene olaukoano ta wa no moa kakaka. Nitikagome one meko toa kotu kakoa meamiki yene takoa one totono yamea pubu okoya.

<sup>12</sup> Tone Ali Muno Yesu Keraisuyo no i agomepa onekele takamele tokono, one tele patu kautakoa kake tamene wa no moa kakaka tokolo onepala ke wane uku. <sup>13</sup> Papete one ibini paya tetepo takoane one agale yakoa motane yene tete meane toane lene piane ago yakou. Nitikouyake Akolaliyo no ela motokome kibu moamoka. One agale pine piko toane agopa moane Keraisu wene toamoane tokolu tokome ni kibu moamoka. <sup>14</sup> Kibu moamou wa tone Ali Muno agome no pewe wia tagatapeka. Nipa Yesu Keraisu-pala lipuane mekene oneke wene tugoane meane yete pade ali atoake wene mekoane meane tomotoa tokome toka.

<sup>15</sup> Etene nimini okala tane agalepa ukuno, ali atoa peyame yakoa mootapeamediki. Yesu Keraisuyo poanele tokoi yene toa moademe itonoke nekeneya. Ete ali atoame tokoi poanele moane patukoane poanele pine wiane tokou ago no i mekene uku. <sup>16</sup> Nopa poanele pine wiane tokou agoke Keraisu Yesuyo poti ko akene wene-kama pia ela motokome no toa motoka. Nipa mea kama poadete oneke wene tugatekoi yene peya ela motokome toateka adeka pia toka. <sup>17</sup> Nitikano, ali atoa eya kuya peya talo toa-kala kama pokago Akolali kei pia-kala kama patoane uku. One tuameneya pa mea kama poko. Tone leneme enamele toamoko. Tone Akolali wa oateko agopa one odene meko. Onepa nitane agono, one ibini kamotoka kamotoka toa-kala kama patoane uku. Ee nimini.

<sup>18</sup> Anu mana Timosi eya tamene wane ikilepa neeke papete oa piane toane litikene uku. Eni oa piane agale wene taneya meke poyo agome-kiti tou toa <sup>19</sup> Keraisunole wedoa takoa togamene. Ni neke tepeme ta wa oa epetekakale-kama litia tamene. Pade-kitame nitamekete ue dipi pata paka pome kaua atiou toa etepea pote atutapeneyea. <sup>20</sup> Dikane agota Aimeniasi Alekesadata einagotake Setanu awinome tete memotoane wakou. Nipa einagotame Akolaline ibini paya tetepo takoake wamotoane tekene tokou.

### Losule Wedetekoa Tekete Toatekomo

**2** <sup>1</sup> Eya tobou kakoa tamene wane uku-ye. Ali atoa peyane kowitikakilepa i ago i atoa auapeano ta, ke wa kowitikakala

tamene. <sup>2</sup>Tone ako tobou ali-kitaneka ni kiwike lokoa ta yopia meki peyaneka kowitikatoane uku. Nipa Akolalinele takoa tonekele uutukoa toa tikilepa tepe kolotini kilikoa pimotoa poti mea toadete tobou yenane kowitikato wane uku-ye. <sup>3</sup>Edikoa kowitiketepa epetanele tekete toko. Nitikolo yatekome toto toa motoko ago Akolaliyo epetanele eni tiki wa wene epetaneyya meko. <sup>4</sup>Nipa ali atoa peyame one nimini agale yakoa momotoane ukuno, toane mou wa wene epetaneyya meko. <sup>5-6</sup>Tone Akolali wa oateko agopa odene ago meko. Ni ali atoame Akolaline yono moa lipumotoa ka patu kakago odene ago meko. Einago Keraisu Yesuyo toto peya oto toa moademe ali latia nome tuaneya. Akolaliyo papete wene toopiane toa eni taateko tikilepa eni toateka oi ponoka-pete nitaneya. <sup>7</sup>One eni tanemo mo wiane tqaweane omotoa Akolaliyo nopa one Aposelo ago takoa moa kakaka. Enipa nimini uku. Kapene wakamuku. Nipa e ku pa yatene Yesuke wene tuga memotonu, kini pitikika onekemo niminimo olaukama yamene wa no moa kakaka.

<sup>8</sup> Ta pikoye yene nate wene pianeyea mea yono ate pitikoa kowitikilepa kotimi luane wene wawa neno wamo toa kowitimotoane uku.

<sup>9</sup>Atoa yatenepa kini mamina kakilepa kaloa wedoa tukoa kawamo a poti wene pia tamene. Kini pine puputua pitikoa paduya paduya pine munoke tukoa kini kabeke paduya-kti kaloa pia enika eniyake wene piitikaneya meameamene. <sup>10</sup>Nipa Akolalike wene tugoane meku wa iki atoame toatiki toa yete pade ali atoa mama moa epetanele tamene. <sup>11</sup>Panagome-kti pademo olaukaoa kakaka agale waametekoa poti witimoa yakakoa meamene. <sup>12</sup>Nipa kini losu yapu obo a mekoika atoa yatename ali yatene Akolalinemo olaukaoa talo toa tomotoane wamuku. Agale waametekoa poti memotoane uku. Ni edoa-mo. <sup>13</sup>Akolaliyo namolo takoa ali pade Adam wa ibini oa latia meko a wa naniko atoa pade Ipi latia meko a taneya. <sup>14</sup>Nitaneyake Setanuyo ali Adam oa yotokamo a atoa Ipi oa yotokaneya. Nitikale einatoame Akolaline totono tetekakome poanele eni taneya. <sup>15</sup>Nitaneyake atoa yatename mati opikoli-kama Akolaliyo mama moa auapekala too. Nipa onekele takama yawa yete pade ali atoake wene meko a mea epetanele toa poti utanele toa tokolipa nitoo.

### Akolaline Yene Yopiki-kitame Toatikimo

**3** <sup>1</sup>Nimini okala tanemo ukuno yakamene. Panagome-kti Yesuno ali atoa yopiane meou wa wene pikomepa epetanele toateko wene eni pikome toko. <sup>2</sup>Yesuno ali atoa yopiko agomepa ete-kitame paduya namike koiso akatikile toamoa ni atoa odene moa koua mea ni utanele-kama toa poti yawa ni epetekoa mea ni yete pade ali atoa one yapu noe wa makutukoa moa ni pademo pademo wene toa olaukaoa too. <sup>3</sup>Ni gerepi po ku ue nokoa kawamo a lene piamoa poti ko akene wene pia ete yene-pala

neno wamo a kueke wene pitikaneya meamoa too. <sup>4</sup>Ni one mati atoa talo toa epetekakilepa one mati-kitame one oka agale yakoa toa one kei-pala pia tomotoa too. <sup>5</sup>Yopikagome nitameneya one mati atoa talo tokome toatekale agopa tokalemekomepa Yesuno ali atoa edoa talo tomotoa-pe. <sup>6</sup>Yesuke tepe kolotini pene peko a pika agopa takoa moa kakameamene. Onepa tube ago kaku wa yopia potokakayano, takoa moa kakameamene. Setanu onepa etene ako ago kaku wa wene pikake Akolaliyo wakene toa einagoka wakaya tokolo ni uku. <sup>7</sup>Losu yapu poamiki-kitameke kei piki alipa takoa moa kakamene. Ete-kitame kei pi amiki agopa Setanuyo likoa enekome labakakolo oneke ya takaya tokolo ni uku.

**Yesuno Ali Atoa Yopiko Alike Lokoa Mea Losule  
Talo Tiki Ali-kitame Toatikimo**

<sup>8</sup>Eina toa Yesuno ali atoa yopiko alike lokoa mea losule toatiki ali-kihi takoa moa kakakilepa ete-kitame kei piki ali-kihi takoa moa kakamene. Dikane pupu toatiki ali-kitipa dikoa meoi. Keke takuta kawamo a gerepi po kū ue nokoa kawamo a kue eya moadiya wa yotoko a moamoa tamediki. <sup>9</sup>Ni Akolaliyo ali atoa-pala papete kau koa mema nekenemo Kerais u nokome tanemo wedoa yakoa motikilepa kini tepeme ta wa oa epetekaka toa-kama toa tamediki. <sup>10</sup>Eni ali-kihi wete moa kakameneyake kini toatikile oyake tiki patu wa kini losule tekete tikile leneme wia pikala tamene. Ni epetanelelo tokoli eneketepa moa kakamene. <sup>11</sup>Eni ali-kitane natono-kitameka eya toa meoi. Ete-kitame kei piatikile toa yete pade ali atoa-pala a koa agale wamo a utanele-kama toa tou wa ikile-kama toa tamediki. <sup>12</sup>Eni ali-kitame atoa odene moa koua mea kini mati atoa kini yapu meki peya talo toa epeteko a tamedeki. <sup>13</sup>Yopiko ago ke lokoa mea losule edikoa wedoa tekete nipa Yesuno ali atoame kei piatikile eni tekete tiki. Nipa Kerais u Yesu patu wedoa kautakoa kakete onekemo akamene pitu moameney a atiki toa meki.

**Akolaliyo Papete Kau koa Mema Nekenemo**

<sup>14</sup>Timosi neke i pipia wiane mekakilepa ne mekota wini tigotokoane nuno wene piane tuku. <sup>15</sup>Wete noameadekolupa nipa i pipia moa oi mootokoapa Akolaline yatene toto mekete toatekole wene toa too. Akolaline yatene wane ukupa mea kama poko Akolaline losu yateneke uku. One nimini akene agale wedoa pikoa kamotoa tokome yapu pigi takoa moa wiou toa eni yatene one wa takoa moa kakaney a. <sup>16</sup>Akolaliyo ali atoa-pala papete kau koa mema nekenemo toa Kerais u taateko a tanelepa tubele mati eni tadekono, padameka enilepa pale tane tetepo takamele toamoko. Enilekepa eya wa wia mekaney a piko.

Kerais u taateko a nikilepa tono melepu kakaney a nekenemo. Epetane Yominiyopa einagopa kiyo akenele-kama toko ago wa wene

takaneya. Edelo ali-kitamepa einago enaneya. Onekemopa e ku yatene pitikoi toa oa pupitikatapeneyea. Itonoke mekoi-kitipa oneke wene tuga meaneya. Akolaliyopa einago one pa taneya mekanata a tibuke moa kakaneya wa panagome wia mekaneya.

### Kapene Tikisa Ali-kitike Pubu Akenemo

**4** <sup>1</sup>Epetane Yominiyo eya wa keleyo wene takakome oko. Naniko pade-kitame Akolalinele takoake wakala toi. Nitiketepa keke takuta kakene ipono-kitame oa yotokanemoka Setanuno poane yatename olaukanemoka yakoa toi. <sup>2</sup>Kini eni yakoa tokoimopa ali pade-kiti kini tepe kolotini toe kabunume keneya kelianeya meou toa mekete poaneleka epetaneleka takoa enamoa olaukoi. Niminimo akene tetepo takoa oake kapene agale oatekoi yene keku. <sup>3</sup>Nitoa olaukakilepa ali yatene tiobali kawa atoa moamato wa oa padaya padaya nee kekaneya latikoa wawa noamato wa olaukoi. Yesunomo yakoa moa pine *toa* wene tokoi-kitame onepala ke wa ootokoa moa nomotoa-kama Akolaliyo latia pikaneyake ntoi. <sup>4</sup>One latia pikaneyaka peya epetaneya-kama latianeyano, odeneka kekaneya latikakile toameamene. Eniya peya onepala ke wa ootokoa namele toko. Ni edoa-mo. <sup>5</sup>Akolaline agale piko toa ke wa kowitiketepa nipa eya kuya nee peya moa namele toko.

### Keraisunole Wedoa Takako Ago

<sup>6</sup>I agale i i wane oane neeke wetekaku toado Yesuno ali atoa olaukakepa nipa Keraisu Yesunole wedoa takake too. Oneke wene tuga meke toatekamo onekemo olaukakounakamota eni epetane peku lawetekolu noa tokana toa pa toomoa poke olaukakepa nipa toa epetekake too. <sup>7</sup>Pade-kitame Akolali ko wamekete la agale oa pamo oa tikino, titi takoa yakameamene. Nitameneya Akolalinele takateko kotu kakoa enekala tamene. Ni edoa-mo. <sup>8</sup>Tone tigini kamotoa olaukanele teketepe tone wa auapeatekole eni toko. Akolalinele takaketepa nipa tone wa wedoa auapeatekole eni toko. Nipa itonoke pa mekokaka a tibuke pote mea kakokaka mea epetekama poo. <sup>9</sup>Niminimo okala tanemo ukuno, peyame yakoa mootapeamene. <sup>10</sup>Onekele takateko kotu kakoa toa enoai toa kakilepa mea kama pokoa Akolaliyo wipitikome toatekole nepia-kala mekete tekete ni toko. Einagome ali atoa peya toane moadiya wa yopikoa mekome oneke wene tuga meki peya toa mokala toko.

<sup>11</sup>Wini oane wetekaku toa toe toe wa neke oya-mikihi olaukoya tamene. <sup>12</sup>Panagome-kiti i ago nepa pa tuali kake toko wa paya tetepo takakayano, pademo pademo oa ele kule toa tikilepa Yesunomo yakoa motane yene mekete toatikile adeka pia tamene. Nipa yete pade ali atoake wene mekhoa mea ni Keraisunole wedoa takama poke ni poane wene takoa koikatapeneyea mea tamene. <sup>13</sup>Nopa wida wete noameneyake

wini ali atoa kakakoa Akolaline agale oi motokoa ni onekemo i i wa mo wia kawa pine tøa olaukoa tamene-ye. <sup>14</sup>Yesuno ali atoa yopikoi ali-kitame kini yono neke mataike pikoli Akolaliyo onekele takateka tele lukakana. One eina tele lukakana wene kayapeamoa onekele wedoa takama yamene. <sup>15</sup>Ina okouna wene kibutukoa mea tokala tamene. Wene kibutukoa mea tikilepa nipa neke namolo toma yakanakale moa patukoa wedoa toomoa yamene. Peyame enemotono, nitamene. <sup>16</sup>Nepa mea potokoa pata pamo olaukoa takayano, wedetekoa mea olaukoa tamene. Mea epetekoa olaukakilepa nipa Akolaliyo neeka neke agale yakoa motokoi yeneka toa momotoa teke too.

### **Yesuno Ali Atoa Yopikete Toatekomo**

**5** <sup>1</sup>Ada agome-kiti poanele tokalepa kikoa akameamene. Nekatai tetepo takoa poti mane oa moamene. Tualika epene alika neke wamene-mikitika tetepo takoa yopiamene. <sup>2</sup>Atue deyaka epene atoaka neke nine tetepo takoa yopia ni tuatoa yatene neke laine-mikitika tetepo takoa mea leneme kode noamoa poane wene takoa koikatapeneya mea yopiamene.

<sup>3</sup>Yawale yapu nepo atoa-kiti paya tetepo takamoa wedoa mama moa yopiamene. <sup>4</sup>Nepo meko atoa-kiti one mana kono-mikitika one kaua-mikitika meadekolipa one eni kako yename Akolalinele takakete toatiki toa eya tomotamene. Kini etene ninetame opia egetekoinake nami wia kini nepo atoa mama moa egetemotamene. Akolaline wene epetekatikile enino, nitimotamene. <sup>5</sup>Pade kawameneyea yawale yapu egetiniya meko nepo atoapa kidene mekome tokome Akolalike wene mataneya mea ta ete likoa oto likoa one auapeano ta wa kowitikala toko. <sup>6</sup>Nepo atoa padame nitameneyea one kola utukole-kama tou wa etepea toma pokolopa Akolaliyo einatoapa tuane atoa tetepo takoa wako. <sup>7</sup>Nepala i ukumopa nepo atoa-kitame yakamotono, i i wa mane oa moamene. Ete-kitame kiwi kikoa akatikile toamomotono, nitamene.

<sup>8</sup>One kako ali atoaka one etene nineta one mati atoaka mama moamoko agopa Yesunole takoake wakene ago eni. Yesunomo yakamadete waki-kitame ele kule poanele tiki toa einagome moa patukoa poanele tubele eni toko.

<sup>9</sup>Yopiki ali-kitame losu bokuke ibini wia meko agetatiki nepo atoakitipa dikoa epetanele tiki atoa-kiti. Ana tuutukaneyake pade alike poamoa ni ege odepeta kadukoa wa tuku melepu kakoa (60) penane mali moa patukoa mea <sup>10</sup>ni ete-kitame kei piatikile toa ni kini mati-kiti wedoa talo toa tubetekoa ni eko ali atoa kini yapu noe wa makutukoa moa nee takoa lawetoa ni Yesuno ali atoa kini yapu nomotoa kawake kakene kege ueme kogoa ni ke enekakolo meki-kiti mama moa auapea ni ele kule epetanele toa tiki. Dikoa meki nepo atoa-kiti takoa moa egetamene.

11-12 Nepo atoa padekapa tuatoaka epene atoaka takoa wawa kini ibini bokuke wia mekoा egetameamene. Dikane nepo atoa-kitame Keraisunole-kama takou wa oa togotoake ali padeke wene kakoa etepea piki. Dikou wa ikile tagoa toamekete pade alike pikilipa ete-kitame aкоа agale amele toko. <sup>13</sup>Dikane nepo atoa-kiти loyo mea yapu yapu yaki. Nitoa eni poanele moa patukoapa agale ete kotuka oto kotuka toa ni ete yenamе namene wameneyake kini okoimo yakadete pokala toa ni pademo pademo wamatikimo oa enika enile tokala tiki. <sup>14</sup>Enilepa Yesuno yatene atoa-kitameke tiki wa toto-pala poi teia meki-kitame poanemo akaya tokolo tuatoaka epene atoaka ana tukolopa eya tomotoane uku. Ali padeke pome mea mati opikoa ana matita mama moa pupu wedoa tomotoane uku. <sup>15</sup>Nepo atoa padeka-kitame Yesunole takoake wawa Setanunole takama yakili tekene ni uku. <sup>16</sup>Nepo atoa-kitane oboा pikane kue adamokolo edoane egetekу patu wa yopiki ali-kiти wene keda taneya mekayano eya tamene. Yesuno agale yakoa motane atoame-kiти one-pala po pianе nepo atoa moa egetemotamene. Nitikolopa yopiki ali-kitame pade kawameneyя yawale yapu egetiniya meki nepo atoa-kiти takoa kue eya adekoа tatia meetapeamele toko.

<sup>17</sup>Yesuno ali atoa yopia epetekaki ali-kiти-pala ke wa oa kinikiya tatia keda takoa meamene. Nitoa metekilepa Keraisunomo mane mane oa olaukoа tiki ali-kiти takoa kinikiya etene wedoa keda takoa mekala tamene. <sup>18</sup>Enilekepa Akolaline bokuke eya wa wia mekanoya piko. *Witi kу tatianeya pikoka yaku takoа pootapemotaо pitimekawe kai kawame kauta kauta toa pokome witi kу-pala noma yamotonо, timini po toameamene. Ni panagome-kiти neke pupu takakolopa one eni pupuke kue meateko kotu kakoa meamene wa padame wia mekanoya.* <sup>19</sup>I yopiko agome padele poanele tokale enekou wa odene agome-kiти akanokalepa one eni okamo yakameamene. Ali tebolo takutame akanokolipa nipa yakamene. <sup>20</sup>Yopiko ali-kitame padele poanele tadekolipa nipa ali atoane lene yoto moa kakoa kikoa akamene. Ete-kitame poanele tamene piti motanoya memotono, nitamene.

<sup>21</sup>Akolali Keraisу Yesutaka Akolaline takoа motane edelo ali-kiтика kakakoane nepala ina oane metekule-kiти yakoa tamene wane uku. Nipa ali atoa peya edikoa talo tikilepa kamo yene ponopene yene takoа enamoа kiyoke-kama tamene. <sup>22</sup>Yesuno ali atoa yopiateko ago takoа moa kakakilepa mekamotekе pitake toameamene. Einagome padele poanele tadekalepa one toka poanele neke weamutukayano, nitameamene. Ele kule poanele titi takoа toameamene. <sup>23</sup>Timosi nepa yene mokoa kake tokono, neke eni yeneka neke tepene witakala toko yeneka teigadепа weneyя ue-kama noameamene. Gerepi po kу ue deya-pala nokala tamene.

<sup>24</sup>Pade-kitame kini poanelepa keleyo-kama tiki. Kini koiso wete akameneyake kini poanele tikimo ta peyake oa pupitikamotoа tiki.

Pade-kitame nitamekete kini poanelepa naniko keleyo witamotoa kaukoa tokala tiki. <sup>25</sup>Eina toa panagome-kiti ele kule epetanele tokolopa peyame keleyo enamele toko. One epetanelepa kaukoa tokoloka kauaneya pia kawamademe toko.

**6** <sup>1</sup>Kueme topo toa moa egetane yene kime pine ali-kiti kei pia pupu-pala wedoa takamene. Kipa Yesuno ali atoameke pupu takoa potokaki wa Akolaline ibini paya tetepo takoa tone olaukakomoka pamo tetepo takoa wakaya tokolo ni uku.

<sup>2</sup>Pinago pade Yesuno agale yakoa motane ago tadekalepa nipa i agopa ame wa amele toko wa taba ago tetepo takamoano, one pupu wedoa takama pamene. Nipa pinagopa Yesunomo yakoa motane agono, Akolali oneke wene mekhoa mekome toko wa one pupu wedoa takamene.

### Kueke-kama Wene Piitikaneya Meameamene

Timosi nepala i ukule-kitika wini yename tamene wa mane mane oa olaukamene. <sup>3</sup>Akolalinele takakete toatikile i i wa tone Ali Muno Yesu Keraisunomo tqawea akaki ali-kitame nimini olaukakimo ete pimotoa panagome-kiti pade olaukakomepa nipa eya tokome toko. <sup>4</sup>Pademo pademota wenepa tuku wa pinali one wa kei pikomeke nateya weneka toameneyea meko. Dikane agopa ete yene-pala mokota oa neno oa toatekole piamokolopa wene poaneyea meko. One oko agale yateki-kiti ete oto wa wene poaneyea mea ni mokota oa ni poanemo oa ni ete yenepa kipala poi teiane yene tetepo takoa tiki. <sup>5</sup>Nipa wene moa koiganeyea mea niminimo agopa takatapeneyea mea tekete ete oto wa agale toonali yoma piki. Akolalinele takakenepa nipa kamo toma pou wa paya wene pia tiki ali-kitike uku.

<sup>6</sup>Panagome-kiti Akolalinele takama yakilepa onekeya oyake piko wa tepe kolotini kilikoa pimotoa mea takakomepa nipa kamo ago meou toa wedoa meamele toko. <sup>7</sup>Tonekquane tepene mea nokoo-pete padefa deyaka aua noamokoo. Wa naniko itono tewitikoa tua peketepa tonekeya etene padefa deyaka aua pamele toamoo. <sup>8</sup>Tone noateko nee-pala tone kawateko maminata pikolopa nipa tonekeya adekaoa piko wa epene wene pianeyea meatoane uku. Ni edoa-mo. <sup>9</sup>Kamo tou wa wene pia meki yenepa Setanuyo likoa enekome one wako labakoa mokala toko. Eni yene paya nou toa mea padefa padefa tepi motuku pekete toapa tua atutapekala toi. <sup>10</sup>Ali atoa kueke-kama wene piitikaneya mekilipa kini tepene padele padele poanele witoa tagatapekala toko. Ali atoa padeka-kiti kueke-kama wene piitikaneya meketepa Akolalinele takoake waku pekete toa tepe we taneya meki.

### Poloyo Timosi Mane Mane Akenemo

<sup>11</sup>Timosi nepa Akolaliyo one wa takoa moa kakako agome enika eni poanele titi takoa pitoa pamene. Nitapa eya toatekoleke-kama wene

piitikaneya mea tamene. Kiyo akenele toa ni Akolalinele wedoa takoa ni Keraisuke wene tugoane mea ni eko ali atoake wene mekhoa mea ni ke enekaka-peteka Akolalinele pa takama yawa ni poti ko akene wene pia tamene. <sup>12</sup>Eko ali-kiti-pala teyapea moa patukanali you toa keneya Akolalinele wedoa takamoaa pamene. Ali atoa peya matiyame enekoa kakoika Yesuke wene tugoane mekene tuku wa ue motoka-pete Akolaliyo nepa mea kama pomotoa tokome one wa kayo oa motaneyano, meane kama poatekule dekoane mou wa onekele wedoa takamoaa pamene. <sup>13</sup>Eya alita, padeya padeya peya wene takoa yomini mekhoa toko ago Akolali ni Podiase Pailase kakakoa niminimo tqawea akene ago Keraisue Yesu einagotane leneke kakene eya tamene wane nepala uku. <sup>14</sup>Yesuno totono pademoka moa koigamoa padeleka katekoaa wawamoa wedoa pikoa kamene. Ali Muno Yesu Keraisue wakapea nokaleka nitima pamene. <sup>15</sup>One eni noateka oi ponokalepa Akolaliyo pa wa oto wetekoo. Akolali eya toko agome nitoo. Onepa wedianeya-kama meko. One odene ako odene tobou ago meko. Ali Muno peya tobou meki peya oneke-kama lukoa meki. <sup>16</sup>One odene tuameneyaa mea kama poko. One pa taneya mekota odene agoka pome kamele toamoko. Padameka one enekile toameneyaa. Padameka one enamele toamoko. Onepa dikane agono, toto peya telekole toa yopia kama pamene wa one kei pia-kala kama patoane uku. Ee nimini.

<sup>17</sup>Kamo yene eya wa mane mane oa olaukamene. Mate agale wamoaa kini kamoya eyake wene piitikaneya meamoa tamene. Kini kamoya pa pia kawamoono, toto wedia memotoa pewe witikome padeya padeyata meteko ago Akolali oneke-kama wene piitikaneya meamene wa olaukamene. Nipa ele kule epetanele tikile kamole tetepo takoa tamene wa olaukamene. <sup>18</sup>Eyaka tamene wa olaukamene. Ele kule epetanele toa ni yete pade ali atoa auapea ni kinikiya kamu toameneyaa wedoa moke toa tamene. <sup>19</sup>Edikaketepa a tibu meemoa pekete moatiki kamoya nodokoa piou toa tekete toi. Nitiketepa nimini mea kama poatekoile pikoa kawei wa kamo ali atoa olaukamene.

<sup>20</sup>Ae, Timosi Akolaliyo ne yametakana toa-kama wedoa pikoa kamene-ye. Pade-kitame onekemo wawa pamo-kala ikilepa imopa niminimo-kama uku wa oake ete oto wa neno oa kapene wakoa iki. Enika enimo titi toa yakameamene. <sup>21</sup>Pade-kitame enika enimo yakoa motekete tekete Akolalinele takoake wawa pata paka etepea pokoi.

Ne mekota wida meki-ktiti kiwi peyapa Akolaliyo pewe wia yopimotoane uku-ye.

Opa anu agale eni.